

QK. 791.

v. Carlowitz



11.

Eine Reichpredigt:

Über dem Begrebnis

der Edlen / vnd viel Thugentsamen
Frawen Agnesen Wilpurgin Witfrawen /
welche den 5. Februarij des 1577. Jars /
zu Dresden in Christo seliglich ents
schlaffen / Vnd daselbst den 7. Febru
arij Christlich zur erden
bestetiget wor
den.

Handschrift von
Carlowitz

Geschehen von

M. Petro Glaser / Pre
diger zu Dresden.

M. D. LXXVII.



Faint, illegible text at the top of the page, possibly a title or header.

Several lines of faint, illegible text in the upper middle section.

A single line of faint, illegible text.

Two lines of faint, illegible text.

A single line of faint, illegible text.

A faint, illegible stamp or seal impression.



Den Bestrengen vnd

Ehrenechsten Schwalt von Carlwitz/
Churfürstlichem Sechsischem Zegermeister/
Desgleichen Adamus vnd Wilhelm von
Carlwitz gebrüder / Meinen günsti-
gen Jungfern / vnd besondern gut-
ten freunden.



Gottes gnade vnd friede von
Gott dem Vater / durch Jhe-
sum Christum / vnsern Herrn vnd
Seligmacher zuuorn:

Destrenge vnd Ehrenechste
Jungfern / Es sagt der Königs-
liche Prophet Dauit / im zwen-
vnd vierzigsten Psalm / Wie der
Hirsch schreiet nach frischem was-
ser / also schreie seine seele zu Gott /
nemlich nach trost vnd hülffe. Also pflegen alle
rechte Christen zuthun / wie ein geiagter Hirsch
zum frischen wasser leufft / das er sich daselbst
wider erfrische vnd erquicke / labe vnd stercke /
A ij also

also wenn die Christen vom Teuffel vnd der Welt / mit mancherley innerlichen vnd eusserlichen anfechtungen vnd verfolgungen / geiaget vnd geplaget werden / vnd sonderlich wann sie in todes nöten ligen / vnd inen leib vnd seele verschmachten wil / so lauffen sie zu dem rechten wasser des lebens / das ist / zu Gottes Wort / sich damit zuerfrischen vnd zustercken / wie auch David saget Psalm 24. Dein stecken vnd stab tröstet mich / da nennet er Gottes wort seinen stecken vnd stab / denn gleich wie ein Wandersman / der eine grosse last auff seinem rücken tregt / wenn er müde vnd matt wird / sich auff seinen stab / den er in seinen henden tregt / bisweilen zulehnen / vnd zustönen pfeget / damit er ein wenig drauff ruhe / also wenn wir Christen / die wir alhier Wandersleute sein / gros creuße vnd leiden auff dem halse tragen / so können wir auff nichts besser ruhen / als auff dem Wort Gottes / welchs vns trösten vnd stercken kan.

Desgleichen saget er auch im 119. Psalm / Dein wort hat mich wider erquicket vnd lebendig gemacht / vnd Jeremias cap: 15. In des enthalt vns dein wort / vnd dasselbige ist vnsers herzens trost vnd freude. Item S. Paulus Rom:

Rom. 15. Was uns fürgeschrieben ist / das ist
uns zur lehre geschrieben / auff das wir durch
gedult / vnd trost der schrift hoffnunge haben.
Gottes wort ist gewislich die beste krefftigste
arkney / das liebste confect oder latwerge / das
edelste güldene wasser / oder wasser des lebens /
damit wir uns anstreichen / wenn wir in harten
vnd schweren leiden stecken / vnd uns die
ohmacht der verzweiflung zuhenget / der schlag
des Göttlichen zorns / der schwere gebrechen
onserer sünde / vnd alle hellische plagen rüren
wollen.

Gleich wie nun der Hirsch / welcher geiagt /
nach dem frischen wasser leufft / sich damit zu
erquicken / zuuor das wasser hat kennen lernen /
vnd weis wo es stehet vnd gehet / oder leufft /
derwegen ers auch bald finden kan / wenn ers
aber zuuor nicht weis / mus er lange lauffen bis
das er eines findet / vnd fellet ein solcher Hirsch
offte darnieder / mus verschmachten vnd sterben.
Also wenn wir Christen im creuß vnd leiden /
anfechtungen vnd versuchungen / vnd sonderlich
in todes nöten / mit Gottes wort wollen ge-
tröstet werden / so müssen wir zuuor dasselbige
wasser des lebens wol studiert vnd gelernet
A iij haben /

Haben / so können wirs darnach bald finden /
vnd vns damit trösten / denn wie wir bey Got-
tes wort halten vnd stehen im leben / also stehets
vnd helts auch widerumb bey vns im sterben /
Dessen wir an E. G. geliebten Schwester ein
augenscheinlich Exempel gesehen / welche weil
sie eine liebhaberinne Gottes worts vnd seiner
Diener war / vnd deshalb Gottes wort fleissig
hörete vnd lernet / so stund es ir auch trewlich
bey in irer krankheit vnd todesnot / also / das sie
den teuffel vnd todt verachten / vnd getrost in
todt setzen kunte / das sie auch deshalb so eine
grosse begier vnd verlangen / hoffnunge vnd
sehnen zu sterben hatte / das sie auch darüber
erschrack / wenn man sie tröste vnd sagte / das es
etwas mit ir besser würde / welchs kein mensch
thun kan / es sey denn das er aus Gottes wort /
vnd durch den heiligen Geist versichert sey / das
er an Gott einen guedigen vnd barmherzigen
Vater habe / vnd das er gewislich ein ander vnd
besser leben an dessen stadt bekommen werde /
nemlich an stadt des zeitlichen / ein ewiges / an
stadt des trübseligen / ein freudenreiches / darin-
nen ewige freude vnd wonne sein wird. Weil
wir den solchen nutz aus Gottes wort schöpfen /
so sollen wir thun wie die Ameissen / die im
Sommer

Sommer eintragen/samen vnd zu rath halten/
damit sie im Winter ire narunge vnd auffent-
haltung haben / vnd nicht wie andere faule
Würmer hungers halben verschmachten müs-
sen / Also sollen wir auch im sommer/ das ist/
wens vns wolget / ehe der frost / reiff / vnd
schne der widerwertigkeit vns oberfelt / die
geistliche seelen speise vnd wasser des lebens/das
lebendige wort Gottes eintragen / dasselbige
in den kisten vnsers herzens verschliessen/ auff
das wir im winter der trübsal/wenn angst/not/
vnd der bittere todt hauffen weis zu vns ein-
schleicht/ zu dem verrat vns finden/ alda unsere
matte verschmachte herzen/seelen vnd gewissen/
laben vnd erquicken / damit wir nicht mit dem
reichen fresser ewigs hungers vnd dursts ver-
schmachten müssen.

Vnd nachdem ich angelangt vnd gebeten
worden / die Reichpredigt / welche ich vber dem
Begrabnis ewer geliebten Schwester Gottse-
ligen gethan / in druck zuuerfertigen / habe ich
denselbigen hierinn zugefallen thun wollen /
vnd E. G. dieselbige meine arbeit zuschreiben/
weil mir bewust / das sie diese ire Gottselige
verstorbene Schwester herzlich lieb gehabt /
vnd

vnd derwegen das gedechtnis ires seligen ab-
schieds gerne behalten / vnd andern gesreunden
werden mitteilen wollen / mit dienstlicher bitte/
sie wollen solches zum besten von mir verstehen/
vnd auffnehmen / Vnd bin denselbigen sonsten
nach meinem vermögen zu dienen erböttig /
Vnd thue sie hiermit sampt iren geliebten
Hausfrauen vnd Kinderlein / in Gottes gnade
vnd segen befehlen.

E. G.

williger

M. Petrus Glaser
Prediger zu Dres-
den.



Sanct Paulus in der Epistel an die Philipper am dritten Capittel.

Unsrer wandel ist im Himmel / von
dannem wir auch warten des Hei-
landts Ihesu Christi des **HERREN** /
welcher vnsern nichtigen leib verfleren
wird / das er ehnlich werde seinem ver-
flertem leibe / nach der wirckunge / da er
mit kan auch alle ding im vnterthenig
machen.

Deses seind herliche vnd trostreiche
wort des Apostels S. Pauli / in welchen
er Erstlich anzeiget / Das wir menschen alhier
keine bleibende stad haben / sondern das vnser
wonunge droben sey im Himmel.

Zum andern meldet er / Wer vns zu solcher
wonunge befordert habe / nemlich vnser Herr
Christus / vnd das er darumb vnser Heiland sey.
B Zum

Zum dritten / Das er nicht alleine ein
Heilandt vnserer seelen / sondern auch vnser
leibes sey.

Zum vierden / Das er vnser leibe verfleren
werde an jenem tage / also / das sie ehnlich wer-
den seinem verflertem leibe.

Zum fünfften / Wenn er solches thun werde /
nemlich zur zeit seiner zukunfft.

Zum sechsten / Das er auch solches wol thun
künne / nach seiner Almechtigen gewalt vnd
wirkunge / da er mit künne auch alle ding ihm
vnterthenig machen.

Zum siebenden / Welchen solche Himlische
wonunge / vnd verflerunge irer leibe widerfaren
solle / als den gleubigen an den Herrn Christum /
vnd welche auff seine zukunfft warten.

Diese stücke wollen wir ordentlich nach
einander handeln / vnd mit Gottes hülffe vnd
gnade anzeigen / was wir darbey zubedencken
vnd zu lernen haben / vnd wie wir es vns in vn-
serm leben nütze machen sollen.

Vom

Vom Ersten.

Das vnserre Wohnung nicht
auff Erden/sondern droben im
Himmel sey.

N sol ewer liebe wissen / das
Gott der Herr den Menschen erstlich
nicht darumb erschaffen / vnd auff die
Erde gesetzt habe / das er ewig darinn
nen sein vnd bleiben solte / wie denn geschrieben
stehet / Das Gott den menschen genomen habe /
vnd ins Paradiß gesetzt / das er dasselbige solte
bawen vnd bewaren / Sondern / das er nur eine
zeitlang darauff oder darinnen sein solte / vnd
darnach wenn er hie die zeit seines lebens ver-
bracht hette / one alles wehe vnd leidt aus diesem
natürlichem leben / in das Himlische vnd ewige
leben versetzt würde. Denn der Mensch ist
erschaffen nach dem Ebenbilde Gottes / auff das
gleich wie er geistlich vnd ewigk lebet / also auch
der Mensch ein geistliches vnd ewiges leben
füren solte.

B ij Vnd

Vnd Gott hat darumb wollen die Welt
gemehret haben / vnd wil noch das sie sol gemeh-
ret werden / das sein Himmelreich dadurch ges-
mehret werde / denn er wolte gerne sein Haus
vol haben / Luc. 14.

Vnd darumb hat er vns durch seinen Son
erlöset / vnd heiliget vns mit seinem heiligen
Geiste / das wir entlich aus dem reiche dieser
Welt / vnd aus des Teuffels reich / darein wir
durch die sünde geraten sein / errettet vnd erlöset /
vnd in das Himmelreich versetzt werden. Wie
S. Paulus saget / Ephe. 2. Da wir tod waren
in sünden / hat er vns sampt Christo lebendig
gemacht (denn aus gnaden seid ir selig) vnd
hat vns sampt im aufferweckt / vnd sampt im in
das Himlische wesen versetzt in Christo Ihesu /
auff das er erzeigte in den zukünftigen zeiten /
den überschwencklichen reichthum seiner gnaden /
durch seine gütte ober vns in Christo Ihesu.

Es bezeugens aber auch sonst viel sprüche
der heiligen Schriefft / das wir menschen nicht
hie daheime / sondern das wir gen Himmel
gehören.

Gen.

Gen. 47. Da Joseph seinen Vater den
Jacob für den König Pharaonem brachte /
fragte in der König / Wie alt bistu / da sprach
Jacob zu Pharaon / Die zeit meiner walfart ist
hundert vnd dreissig Jar / wenig vnd böse ist die
zeit meines lebens / vnd langet nicht an die zeit
meiner Väter in irer walfart.

2. Chro. 30. spricht David / Wir sind
frembdlinge vnd geste für dir / wie vnser Väter
alle / vnser leben auff Erden ist wie ein schatten /
vnd ist kein auffhalten.

Psal. 119. nennet David diese Erden vnd
das Leben / das Haus seiner walfart.

Psal. 39. Ich bin beide dein Pilgrim vnd
Bürger / wie alle meine Väter.

Joan. 14. In meines Vaters hause seind
viel wonunge / wo aber das nicht were / sage ich
euch doch / das ich hin gehe / euch die stete zube-
reiten / wil ich doch wider kommen / vnd euch zu
mir nemen / auff das jr seid wo ich bin.

Joan. 15. Ihr seid nicht von der Welt /
sondern ich habe euch von der Welt erwelet.

2. Co. 5. Wir wissen so vnser irdisch
haus dieser hütten zubrochen wird / das wir
B iij einen

einen bau haben von Gott erbawet / ein Haus
nicht mit henden gemacht / das ewig ist im Him-
mel / vnd vber denselbigen sehnen wir vns auch
nach vnser behausunge die vom Himmel ist / vnd
vns verlanget das wir bekleidet werden.

Ibidem / Wir sind aber getrost allezeit /
vnd wissen / das / die weil wir im leibe wonen /
so seind wir nicht daheim bey dem Herrn / denn
wir wandeln im glauben / vnd nicht im schawen /
Wir seind aber getrost / vnd haben viel mehr lust
auffer dem leibe zu wallen / vnd daheim zusein
bey dem Herrn.

1. Pet. 1. Gelobet sey Gott / vnd der Vater
vnser Herrn Jesu Christi / der vns nach seiner
grossen barmherzigkeit wider geboren hat zu
einer lebendigen hoffnung / durch die auffer-
stehunge Jesu Christi von den todten / zu einem
vnuergenglichem erbe / das behalten wird im
Himmel / euch / die jr aus Gottes macht durch
den glauben bewaret werdet zur seligkeit.

1. Pet. 2. Lieben brüder ich vermane euch
als die frembdlinge / vnd bilgrim.

Heb. 11. Die Erzüäter haben bekant /
das sie geste vnd frembdlinge auff Erden seind /
denn

denn die solches sagen / die geben zuuerstehen /
das sie ein Vaterland suchen / vnd zwar wo sie
das gemeint hetten / von welchem sie waren aus
gezogen / hatten sie ja zeit wider umb zuferen /
Nu aber begeren sie eines bessern / nemlich eines
Himlischen / darumb schemet sich Gott nicht zu
heissen jr Gott / denn er hat inen eine Stadt
zubereitet.

Heb. 13. Wir haben hie keine bleibende
stadt / sondern die zukünfftige suchen wir.

Darvon singen wir auch / Wenn wir
heim faren aus diesem elende.

Diese betrachtunge aber / das wir
hie frembdlinge vnd im Himmel daheim sein /
gibt vns viel herlicher lehre / trost / vñ vermanunge.

Erstlich haben die frembdlinge an denen
orten da sie frembde sein / nichts eigens /
vnd seind damit wol zu frieden / vnd trösten
sich dessen / das sie etwas eigens an andern orten
haben / da sie daheim sein: Also thun auch
rechte Christen / ob sie gleich hie arm sein / vnd
nichts eignes haben / so trösten sie sich doch
dessen /

dessen/ das sie wissen/ das sie reich sein werden
im Himmel/ vnd das sie die Himlische ewige
gütter bekommen werden / welche weit ober-
treffen alle gütter vnd reichthümer dieser welt.

Zum andern/ So stellen vnd schicken sich
die frembden an denen orten da sie sein / nicht
als wolten sie da bleiben / sondern sie machens
daselbst also / das man verstehen kan / das sie
wider weg gedenccken. Also sollen die Christen
sich nicht also in die Welt schicken / gleich als
gedechten sie ewig hie zu bleiben/sondern als die
bald wider dauon wolten/ Sie sollen nicht also
geißigen/schinden/schaben vnd zu sich kraßen/
vnd also treflich vnd herlich bawen/ als wolten
sie ewig darbey bleiben. Darzu vermanet vns
S. Paulus/ 1. Co. 7. Das sage ich aber lieben
brüder / die zeit ist kurz / weiter ist das die mei-
nung / die da weiber haben / das sie sein als
hätten sie keine / vnd die da weinen als weineten
sie nicht / vnd die sich frewen als freweten sie sich
nicht / vnd die da keuffen als besessen sie es nicht /
vnd die dieser welt brauchen / das sie derselhigen
nicht mißbrauchen / denn das wesen in dieser
Welt vergehet.

Col.

Col. 3. Seid jr nu mit Christo auffgestan-
den / so sucht was droben ist / da Christus ist /
sitzend zur rechten Gottes / trachtet nach dem
das droben ist / vnd nicht nach dem das auff Er-
den ist / denn jr seid gestorben / vnd ewer leben ist
verborgen mit Christo in Gott / wenn aber
Christus ewer leben / sich offenbaren wird /
denn werdet jr auch offenbar werden mit jm in
der herligkeit.

Es were warlich keiner so nerrisch / der viel
auff ein haus wendete / vnd viel drein verbauetel
das nicht sein eigen were / da er sich alle tage
besorgen müste / wenn man in würde heissen
ausziehen / Aber hie seind wir so nerrisch / das
wir so sehr auff das irdische bawen / dessen wir
doch nicht einen augenblick sicher sein.

Ben den kindern dieser welt vnd der finster-
nis / scheinen vnd gelten die reichthümer dieser
welt viel / aber ben den kindern Gottes / vnd des
Lichtes wenig / oder gar nichts / gleich wie das
faule holz ben der nacht leuchtet / aber des tags
gar nicht.

Zum dritten müssen die welche an fremb-
den orten sein / sich züchtig vnd eingezogen hal-
ten / damit sie die Herrn vnd Bürger an demsel-
bigen orten leiden können / vnd sie dürffen nicht
solche

solche freiheit zu leben als die bürger gebrauchē/
sondern wenn sie sich vnterstehen ein frech wilt
wesen vñnd leben zu füren / seind mutwillig/
richten hader vñnd lermen an / so ist man bald
hinder inen her / vñnd sie werden eher als bür-
ger gestrafft. Also sollen die Christen hie ein
züchtiges vñnd sitzames / stilles vñnd eingezognes
leben füren / denn wenn die Christen / welche hie
frembdlinge sein / in der welt etwas böses thun /
so wirts inen viel weniger zu gut gehalten / als
den gottlosen / vñnd es wird inen viel vbelser aus-
gelegt / als den weltkindern / die teglich in sün-
den leben.

Zum vierden erkent man die fremblinge
an der kleidunge vñnd sprache. Also sollen die
Christen mit iren Worten / kleidunge / geberden
vñnd wercken eine anzeigunge von sich geben /
das sie auslender sein / vñnd anderswo / nemlich
im Himmel daheime.

2. Co. 5. Wir haben lust außser dem leibe
zu wallen / vñnd daheime zusein / Darumb vleissig
gen wir vns auch / wir sind daheime oder wallen /
das wir dem Herrn wolgefallen. Welche hof-
fertig sind / gotteslesterische vñnd vnzüchtige wort
füren / liegen / triegen / gehören in die welt / vñnd
seind Teuffelskinder / ire sprache vorreth sie.

Zum

Zum fünfften/ Welche an frembden orten
sich vbel/ vnerbar/ vnd nicht redlich halten/ die
seind der ganzen Nation/ vnd irem Vaterlande
eine schande vnd vnehre/ Wenn sie sich aber red-
lich vnd ehrlich / rümllich vnd löblich halten/ so
seind sie irem Vaterlande/ vnd der ganzen Na-
tion eine ehre. Also / wenn die Christen ein
schentlich vnd ergerlich leben füren / so seind sie
Gott dem Herrn/ vnd seinem Worte/ vnd der
ganzen Christlichen Schar/ ein schantfleck vnd
eine vnehre. Wie denn Gott dem David durch
den Propheten Nathan anzeigen lest / das vmb
seinet willen sein Name geschendet werde/ vnd
ist auch deshalben dester greulicher gestraffet
worden / derwegen sagt S. Petrus / 1. cap. 2.
Lieben brüder ich ermane euch als die frembd-
linge vnd bilgrim / enthaltet euch von den fleisch-
lichen lüsten / welche wider die seelen streiten / vnd
füret einen guten wandel vnter den Heyden /
auff das die so von euch affterreden / als von
vbelthetern / ewre gute werck sehen / vnd Gott
preisen / wens nu an den tag komen wird.

Wir müssen vns hie an frembden orten
also halten / das man vns nicht böse brieffe nach
schreibe / damit wir nicht von andern als vngleu-
bige vnd gottlose ausgeschrien werden / sondern

G ij

das

Das sie vns auffnehmen in die ewige hütten/ das
ist bezeugen / das wir recht gleubig gewesen /
welchen glauben sie an vnsern fruchten erkant /
vnd das wir derwegen gehören in die ewige
hütten/ in das Himmelreich/ vnd ewiges leben.
Vnser Landsherr/ das ist Gott der Vater/ lisset
die brieffe / welche durch seuffzen vnd durchs
gebet im fürgetragen werden/ man kan sie nicht
also verschleiffen / wie die Supplicationes/ die
an die Herrn dieser Welt geschehen/ er wirfft sie
auch nicht von sich hinweg vngelesen / wie die
Herrn bisweilen thun / die ires Ampts nicht
warten wollen/ sondern er nimpt sie an/ lisset sie/
vnd merckt was vber vns geklaget wird/ schreibts
an/ das es niemands ausleschen kan/ vnd
gedenckts zu straffen/ vnd strafft auch entlich/
es stehe lange oder kurz an/ so weis er einen
jeden wol zu finden/ es kan im keiner entlauffen/
er hat lange arme/ damit er einen jeden erreichen
kan.

Zum sechsten ist es gebreuchlich vnd ge-
wönlich/ das die Landgleute sich vntereinander
lieben / sich zusammen halten / vnd einander
dienen / So einer aus inen krank ist / oder im
mangel stehet / so rahten vnd helffen inen die
andern aus/ leid irgent einer gefangen/ so thun
die

Die andern hand vnd werck zusammen / das er
wider los wird / vnd so einer auff den hals ge-
fangen sitzt / oder sonst eine schmeliche straffe
leiden sol / legen sie fürbitte / vnd gelt zusammen /
vñ wenden allen müglichen vleis für / das sie ihn
ledig machen / damit er nicht der ganzen Nation
eine schande zufüge. Also sollen die Christen sich
untereinander lieben / vnd guts thun / wie S.
Paulus vermanet / Gal. 6. Als wir denn nu
zeit haben / so lasset vns guts thun an jederman /
allermeist aber an des glaubens genossen.

Zum siebenden / Es pflegen auch die wan-
dersleute an frembden orten vor lieb zunemen /
ob sie gleich müssen vbel essen vnd trincken / vnd
vbel liegen / vnd trösten sich dessen / das es nicht
die lenge / sondern nur etliche tage vnd nacht /
wochen oder monden weren / vnd das sie dan-
noch daheime wider wol essen / schlaffen / vnd
gute tage haben werden. Also sollen die Chri-
sten auch jr creuz vnd leiden gedüldig leiden /
weil sie wissen das es nur eine kleine zeit weren /
vnd das eine ewige vnd grosse freude drauff
folgen sol / Esa. 54. Ich habe dich einen kleinen
augenblick verlassen / aber mit grosser barm-
herzigkeit wil ich dich versamen / Ich habe
mein Angesicht im augenblick des zorns ein

wenig für dir verborgen/aber mit ewiger gnade
wil ich mich dein erbarmen/spricht der HERR
dein Erlöser/Psal. 16. Bey Gott im Himmel/
werden wir freude die fülle / vnd ein lieblich we-
sen zu seiner Rechten haben ewiglich / Dorte
wird er vns trösten/die wir hie gepeiniget wer-
den Luc. 19. Vnsere traurigkeit wird in eine
freude verwandelt werden/die niemands wird
von vns nemen Jo. 16.

Rom. 8. Ich achte es dafür / das dieser
zeit leiden nicht werd sey der herligkeit / die an
vns sol offenbar werden.

2. Co. 4. Dieser zeit leiden/welchs leicht
vnd kurz ist / gebieret eine ewige/ vnd vber alle
maß wichtige freude / die an vns sol offenbar
werden / die wir nicht sehen auff das sichbare /
sondern auff das unsichbare/denn was sichbar
ist/das ist zeitlich/was aber unsichbar ist/das
ist ewig.

1. Pet. 2. Zur letzten zeit werdet jr euch
frewen/die jr jetzt eine kleine zeit (wo es sein sol)
trawrig seid in mancherley anfechtunge / auff
das ewer glaube rechtschaffen / vnd viel köst-
licher erfunden werde / denn das vergengliche
Gold das durchs feuer bewert wird / zu lob /
preis vnd ehren/ wenn nu offenbar wird Jesus
Christus. Da

Da werden wir recht sat werden / wenn
wir erwachen nach seinem bilde / Psal. 17.

Vnd der Gott aller gnade / der vns beruf
fen hat zu seiner ewigen herligkeit in Christo
Ihesu / der wird vns / die wir eine kleine zeit
leiden / volbereiten / stercken / krefftigen / vnd
gründen / 1. Pet. 5.

Zum achten / Wenn man an frembden
orten ist / vnd die zeit herbey kompt / das sie sich
wider anheim begeben sollen zu den ihren / so
frewen sie sich / vnd je ncher sie zu irer heimet
kommen / je mehr sie sich frewen. Also sollen die
Christen nicht erschrecken / sondern ire heupter
empor heben / vnd sich frewen / wenn sie Gott
aus diesem leben durch den todt zu sich for
dern wil.

Wir seind hie frembdlinge / vnd liegen in
dieser welt zur herberge / in welcher der Herr
vnd Wirt ist der Teuffel / desselbigen Wapen
ober der thür heist zum mörder vnd lügner /
er mus die betriegen vnd tödten / die bey im zur
herberge liegen / derwegen sollen wir eilen aus
dieser herberge zu vnserm Vaterlande / Vnd
auff das wir diesem leben feind / vnd grau
werden / vnd eine herbliche begier vnd verlan
gen / hoffnunge vnd sehnen nach vnserm rechten
Vater

Vaterlande bekommen / derwegen lessets vns
Gott hie so vbel gehen / Weil wir aber noch in
dieser bösen herberge sein / vnd bleiben müssen/
sollen wir wider den bösen Wirt / Gott vmb
den schuß seiner geliebten Engel bitten.

Psaln 120. Wehe mir / Das ich ein
frembdlinge bin / vnter Mesech / ich mus wonen
vnter den hütten Kodar / es wird meiner seelen
zu lang zu wonen bey denen die den frieden
hassen.

Derwegen spricht der alt Vater Simeon:
Herr nu lestu deinen diener in friede faren etc.

Item / Paulus 2. Co. 5. Weil wir in
dieser hütten sein / sehnen wir vns / vnd seind
beschweret.

Item / Wir haben viel mehr lust aus dem
leibe zu wallen / Philip. 1. Ich begere auffge-
löset zu sein / vnd bey Christo zu sein.

Zum neunden / Wenn an frembden orten
einer von vnsern Landsleuten sich anheim be-
geben wil / so pflegen wir im das geleite zugeben /
vnd wenn er sich von einem geferlichem bösen
orte begiebt / so betrüben wir vns nicht seines
abschieds halben / denn wir wissen / das es im
dabeime besser gehen werde / vnd sonderlich wenn
wir gedenccken auch bald hernach zu folgen /
vnd

vnd wir pflegen gemeiniglich also zu sagen /
Zeuhe hin lieber Landsman in friede / nu wirstu
anheim zu deinen vnd meinen guten freunden
kommen / vnd mit inen in liebe vnd freude leben /
grüsse sie von meinet wegen / ich wil nicht lange
aussen bleiben / oder von dir sein / sondern wil dir
bald nachfolgen. Also sollen wir auch die vn-
sern trösten / wenn sie sich durch den todt aus
dieser welt / als aus einem frembden orte wollen
anheim begeben / das sie daheim die aller beste
freunde finden werden / als die heilige Dren-
faltigkeit / die lieben Engel / die Patriarchen /
Propheten / Aposteln / Merterer / vnd alle trewe
Lehrer / vnd andere rechte Christen / welche in
Christo entschlaffen / vnd mit inen in ewiger
freude leben werden. Wir sollen inen auch
anzeigen / das wir bald hernach folgen wollen /
vnd das wir sie nur ein wenig zuuor hin schickē /
Wir sollen auch zur bezeugunge dieses vnsers
glaubens / die Christen als vnser Landtleute /
wenn sie von hinnen scheiden / zum Begrebnisse
beleiten / vnd sie ehrlicher weise zur erden bestetis-
gen / vns der wider zusammenkunft getrösten /
vnd derwegen ires abscheides nicht achten / wie
man saget / Widerkommen macht / das ich
scheidens nicht acht.

D

Vom

Vom Andern.

Wer vns zum Himmelreich /
vnd zu der verflerunge vnserer
leibe geholffen habe.

Sanct Paulus zeigt an / das vns Chri-
stus darzu geholffen habe. Wenn der
Herr Christus kommen werde spricht er/
so werde er vns darzu helfen / wie der **HEXX**
Christus selbst spricht Ioan. 3. Niemand feret
gen Himmel / denn der vom Himmel komen ist /
nemlich des Menschen Sohn / der im Himmel ist.
Darnach zeigt er an / wie wir auch durch den
glauben an ihn gen Himmel kommen / Vnd wie
Moses in der wüsten eine schlange erhöhet hat /
also mus des menschen Sohn erhöhet werden /
auff das alle die an in gleuben / nicht verloren
werden / sondern das ewige leben haben.

Ioan. 1. saget der Herr Christus / das er
sey bedeutet durch die Litter / welche der Patri-
arch Jacob im schlaffe gesehen hat / die gereicht
hat von der Erden bis gen Himmel / daran die
Engel Gottes herab / vnd hinauff gestiegen /
vnd spricht / das der Himmel vns offen stehe /
darmit

darmit wird vns zuuerstehen gegeben / wer da
wolle gen Himmel kommen / das er mit seinem
glauben müsse an dem Herrn Christo hienauff
steigen.

Jo. 12. Wenn ich werde erhöhet werden /
wil ich sie alle zu mir ziehen.

Jo. 14. In meines Vaters hause seind
viel wonunge / vnd ich gehe jetzt hin euch diesel-
bige zubereiten / vnd ich wil wider kommen / vnd
euch zu mir nemen / auff das ir seid do ich bin.

Ich bin der weg / die warheit / vnd das
leben / Niemandts kompt zum Vater denn durch
mich.

Vnd darumb heist hie der Apostel den
Herrn Christum / den Heyland / Wie er denn
auch von dem Engel also genant wird Luc. 2.
Vnd in der beschneidunge bekompt er solchen
namen / vnd der alte Simeon nennet in auch
den Heyland.

Er wird aber darumb Heyland genant.

Erstlich das er vns sol helffen von vnsern
sünden / wie der Engel zum Joseph sagt
Math. 1.

D ij Zum

Zum andern/ Das er vns hülffe von
allem jammer vnd elende / darein wir durch die
sünde geraten sein / vnd sonderlich von dem
ewigen elende / als von dem ewigen tode / der
hellen/vnd ewigen verdammis.

Zum dritten/ Das er vns wider hülffe zu
alle dem / das wir durch die sünden verloren
haben/ als zu der gnaden Gottes / zum ewigen
leben / vnd zu ewiger freude vnd seligkeit / vnd
wie hie Paulus saget / zu vnserer wonunge
droben im Himmel / vnd zu vnserg leibes herr-
lichen verklarunge.

Vom Dritten.

Das wir in die Himlische wonun-
ge vnd seligkeit / nicht alleine mit
vnser seele / sondern auch mit vn-
sern leiben kommen werden.

Eliche meinen es sey genug / wenn wir
menschen nur nach der seelen selig würden/
wie jetzt der verstorbenen heiligen seelen
selig sind / wie Nicephorus darvon schreibet
lib. 14.

lib. 14. cap. 45. Aber wir sollen wissen / vnd es
ist vns ganz tröstlich zu hören / das Gott auch
vnser verstorbene leibe wil von todten auffer-
wecken / verklären vnd selig machen / vnd es ist
auch billich.

Denn erstlich hat Gott den menschen
nicht alleine zu der seligkeit der seelen / sondern
auch des leibes erschaffen / Derwegen da wir
solche seligkeit durch den fall Adec verloren / so
hat er seinen Sohn in die Welt geschickt / das er
solte selig machen / das verloren war.

Es ist auch billich / denn die Seele des
menschen thut vnd empfehet nichts / was zur
Gottseligkeit gehöret / ohne den leib / die seele
wird nicht alleine getaufft / sondern auch der leib /
die seele bekent den glauben durch den mund
des leibes / die seele beweiset die werck der liebe
gegen Gott vnd dem nechsten / mit dem munde /
henden / füßen / vnd dem ganzen leibe / die seele
leidet nicht alleine allerley vmb des HERRN
Christi / vnd der Gottseligkeit willen / sondern
auch der leib / vnd es wird im Abendmal des
Herrn Christi nicht alleine die seele / sondern
auch der leib mit dem Leibe vnd Blut Christi
gespeiset / vnd getrencket.

D iij

Vnd

Vnd daraus wollen auch vnder andern
die alten Scribenten / als Irenæus, Cyrillus,
Iustinus vnd andere beweisen / das wir mit
vnsern leiben nicht werden im tode bleiben /
sondern wider von todten auffstehen / vnd
selig werden / denn wie Iustinus schreibet / so
werden vnser leibe mit dem Leib vnd Blut
Christi generet / nicht auff solche weise wie mit
andern essen vnd trincken / da dasselbige in vnser
blut verwandelt wird / sondern durch eine solche
verwandlung / das wir in das Fleisch vnd
Blut Christi verwandelt / vnd wie dasselbige
vnsterblich vnd selig / also auch wir der vnsterb-
lichkeit vnd seligkeit teilhaftig gemacht würden /
darvon Lutherus ein solch gleichnis giebt / das
es mit dieser speise also zugehe / Als wenn ein
Wolff ein Schaff fresse / vnd das Schaff würde
nicht verwandelt in die natur des Wolffes /
sondern die grausamkeit des Wolffes / würde
verwandelt in die einfaltigkeit des Schaffes /
also würde der Leib vnd Blut Christi nicht in
vnser fleisch vnd blut verwandelt / sondern wir
in ihn.

Vber das so wonet der heilige Geist in
vnsern leiben / vnd wir seind Tempel / behau-
sunge vnd wonunge des heiligen Geistes.
Daher

Daher schleust auch S. Paulus / das auch
unsere leibe sollen selig werden / Ko. 8. So nu
der Geist des / der Jesum von den todten auffere
weckt hat / in euch wonet / so wird auch dersel
bige / der Christum von den todten aufferweckt
hat / ewere sterbliche leibe lebendig machen / umb
des willen / das sein Geist in euch wonet.

Solche vnd andere vrsachen erzelet Ter
tullianus im buch de resurrectione carnis, von
welcher wegen unsere leibe von todten sollen
aufferweckt werden.

Erstlichen / Dieweil unser fleisch Gottes
geschöpff sey. 2. Vnd Gott seine weisheit
darinnen antag gegeben habe. 3. Er dasselbige
zum Herrn der Erden geordnet. 4. Dieweil
es sey der Priester Gottes / durch welches seine
Gottesdienst geübet werden. 5. Weil es sey
eine oberwinderin des Teuffels. 6. Ein Tem
pel des heiligen Geistes. 7. Eine Schwester des
fleisches Christi. 8. Vnd mit dem Leib vnd
Blut Christi gespeiset werde.

Vnd solches bezeugen nicht alleine diese
wichtige vrsachen / sondern auch viel Sprüche
vnd Exempel der heiligen Schrift / das wir
auch mit unsern leiben sollen selig werden / wie
vnder andern dieser herlicher spruch anzeiget.

Job

Job 19. Ich weis das mein Erlöser lebet/
vnd er wird mich hernach aus der Erden auff-
wecken / vnd werde darnach mit dieser meiner
haut vmbgeben werden / vnd werde in meinem
fleische Gott sehen / denselbigen werde ich mir
sehen / vnd meine augen werden in schawen /
vnd kein frembder.

Joan. 5. Es kompt die stunde / in welcher
alle die in den grebern seind / werden seine stimme
hören / vnd werden herfür gehen / die da guts
gethan haben / zur auffstehunge des lebens /
die aber vbelß gethan haben / zur auffstehunge
des Gerichtes.

1. Co. 6. Gott aber hat den **HERRN**
aufferweckt / vnd wird vns auch aufferwecken
durch seine krafft.

2. Co. 4. Wir tragen vmb alzeit das
sterben des Herrn Jhesu an vnsern leibe / auff
das auch das leben des Herrn Jhesu an vnserm
leibe offenbar werde.

2. Co. 5. Wir müssen alle offenbaret
werden für dem Richtstul Christi / auff das ein
jeglicher empfahe an seinem leibe / nachdem er
gehandelt hat / es sey gut oder böse.

Vnd

Vnd hieher gehört das gesichte Ezech.
telis 37. Vnd des Herrn hand kam vber mich/
vnd füret mich hinaus im Geist des Herren /
vnd stellet mich auff ein weid felt / das voller
beine lag / vnd er füret mich allenthalben dar-
durch / vnd sihe des gebeines lag sehr viel auff
dem felde / vnd sihe / sie waren sehr verdorret /
vnd er sprach zu mir / Du menschenkind /
meinstu auch das diese beine wider lebendig
werden? vnd ich sprach / Herr das weistu wol /
vnd er sprach zu mir / Weissage von diesen
beinen / vnd sprich zu inen / jr verdorrete beine /
höret des Herren wort / So spricht der Herr
von diesen gebeinen / Sihe ich wil einen odem
in euch bringen / das jr solt lebendig werden /
ich wil euch odem geben / vnd fleisch lassen vber
euch wachsen / vnd mit haut vberziehen / vnd wil
euch odem geben / das jr wider lebendig werdet /
vnd solt erfahren / das ich der Herr bin. Vnd ich
weissagete wie mir befohlen war / vnd sihe / da
rauscht es / als ich weissagete / vnd sihe es regte
sich / vnd die gebeine kamen wider zusammen /
ein jegliches zu seinem gebeine / vnd ich sahe /
vnd sihe es wuchsen adern vnd fleisch drauff /
vnd er vberzog sie mit haut / es war aber noch
kein odem in ihnen / vnd er sprach zu mir /
E Weissage

Weiffage zum winde / weiffage du menschen
Kind / vnd sprich zum winde / So spricht der
Herr / wind / kom herzu aus den vier winden/
vnd blase diese todten an / das sie wider lebendig
werden / Vnd ich weiffagete / wie er mir befohlen
hatte / da kam odem in sie / vnd sie wurden wider
lebendig / vnd richteten sich auff ire füsse / vnd ihr
waren ein sehr gros heer.

Solches hat vns Gott one zweiffel wol-
len fürbilden / mit Moses hand Exod. 4. Da
Moses eine hand in busen steckte / vnd bald
zeucht er sie wider heraus / das sie gar erkalt /
vnd vngestalt / ja gar todt ist anzusehen / bald
da er sie wider in busen steckt / vnd heraus zeucht /
ist sie wider schön vnd lebendig / wie sie am ersten
war / das war einerley hand / vnd krieget doch
bald todes / bald lehens gestalt an sich.

Vnd es seind etliche menschen albereit
mit leib vnd seele im Himmel / vnd selig / als
Christus / Enoch / Elias / Moses / vnd die /
welche mit Christo auffstanden waren / vnd
vielen mit iren leiben zu Jerusalem erschienen /
welche one zweiffel nicht wider gestorben / son-
dern mit Christo auffgefahren sein gen Himmel /
wie Eusebius lib. 1. cap. 13. schreibet / das Thade
DEUS

deus dem Könige Agbarō geprediget habe /
das der Herr Christus mit einer grossen menge
der Heiligen auffgefaren sey gen Himmel / vnd
villeichte haben deszhalben die Patriarchen /
Jacob vnd Joseph / nicht wollen in Egipten /
sondern im lande Ganaan mit iren leiben vnd
gebeinen begraben liegen / als an dem orte da
Christus leiden / sterben / auffstehen / vnd gen
Himmel faren würde / damit sie mit dem Her-
ren Christo auffstünden / vnd auffuren gen
Himmel.

Derwegen sollen wir vor gewis halten /
das wir auch mit diesen vnsern leiben wider
auffstehen werden / wie der Herr Christus
mit seinem Leibe / den er in der Jungfrauen
Marien leibe an sich genommen / vnd mit dem
er gelidten / vnd gestorben / vnd auffstanden ist /
darumb er auch nach seiner frölichen auffste-
hunge seinen Jüngern / seinen leib / vnd seine
wunden / vnd negelmal an seinen henden vnd
füssen gezeiget / Der Herr Christus wird auch /
wie Moses zu Pharaō saget von den Israe-
liten / von vns nicht eine klawe dahinden lassen.

Daher in der ersten Kirchen gebreuchlich
gewesen / das man vber den grebern getaufft /

E ij

damit

Damit man diesen glauben bezeugte / vnd bekente / das die Leichname welche daselbst begraben legen / solten am Jüngsten tage wider auffstehen / wie dessen gedencft S. Paulus 1. Co. 15. So aller dinge die todten nicht auffstehen? Was lassen sie sich teuffen ober den todten. Darvon man auch lisset bey dem Epiphanio wider die Gerinthianer / vnd beim Tertulliano von der auffstehunge des fleischs / vnd wider den Marcionem.

Vnd die Kirchen in Alyphrica haben im gebrauch gehabt / wenn sie haben den Artickel des glaubens erzelet / Ich gleube eine auffstehunge des fleisches / haben sie gesagt / Ich gleube eine auffstehunge **DZESSES** fleisches / vnd haben die rechte hand auff die lincke seidt / auff das herze gelegt.

Darumb auch Bernhardus schreibet im tractat de libero arbitrio, das die verstorbene gleubige nur eine halbe seligkeit haben / nemlich nur nach der seelen / aber noch nicht nach dem leibe / der müsse auch noch aufferweckt vnd selig gemacht werden / damit sie eine ganze / vnd volkommne seligkeit bekommen.

Vom

Vom Vierden.

Es lehret aber S. Paulus nicht alleine
dahlhier/das vnser leibe sollen auffer stehen/
vnd selig werden/ sondern das auch diesel-
bige vnser leibe sollen auffss herlichste verfleret
werden.

Vnd nennet vnser leibe nichtig/ darumb
das sie sündhaftig / vnd von wegen der sünden
allerley krankheiten / seuchen vnd gebrechlig-
keiten/auch dem tode/vnd verwesligkeit vnter-
worffen sein.

Vnd spricht das der HErr Christus
dieselbige vnser nichtige leibe verfleren werde/
also/das sie werden ehlich werden seinem ver-
flertem leibe / von solcher verflerunge redet
auch sonst die heilige Schrift.

1. Co. 15. Es wird geseet verweslich /
vnd wird auffer stehen vnverweslich / Es wird
geseet in vnehren / vnd wird auffer stehen in
herligkeit / Es wird geseet in schwachheit / vnd
wird auffer stehen in krafft / Es wird geseet ein
natürlicher leib / vnd wird auffer stehen ein
geistlicher leib.

E iij Also

Also saget der Prophet Daniel cap 12.
Das wir werden wie die Sternen scheinen
vnd glenzen. Der Herr Christus saget wie die
Sonne Math. 13. Vnd Math. 22. Das
wir den Engeln Gottes werden gleich werden.
Vnd hie saget S. Paulus / das wir werden
ehnlich werden dem verflerten leibe des Herrn
Christi. Darumb auch der Herr Christus
selbst saget Jo. 17. Ich habe inen die herligkeit
gegeben / die du mir gegeben hast.

Vnd von deswegen seind auch Moses /
vnd Elias in der klarheit Christi erschienen /
auff dem berge Thabor Luc. 9. anzuzeigen / das
wir seiner klarheit teilhaftig werden sollen.

Vom Fünfften.

Es zeigt auch der Apostel Paulus in die-
sem sprüchlein an / wenn wir sollen zu der
Himlischen wonunge / vnd zu solcher
herlichen verflerunge durch Christum komen /
nemlich zur zeit des Jüngsten tages / wenn der
Herr Christus kommen wird zu richten die
lebendigen / vnd die todten.

Vnter

Vnter dessen müssen wir hie in dieser welt
der nichtigkeit / das ist der sünden / allerley
creuße vnnnd leiden / schwachheit / krankheit /
seuchen / vnd gebrechligkeit / dem tode / vnd der
verwesligkeit vnterworffen sein / Solchs sollen
wir mit gedult tragen / vnd leiden / vnd vns
immer getrösten der erworbenen vnnnd ver-
heischenen zukünfftigen verklerunge / vnnnd
seligkeit.

Vom Sechsten.

Damit wir nicht dran zweiffeln möchten /
das vns der Herr Christus solches wol
mitteilen könne / vns also verkleren /
vnd mit leib vnd seele selig machen / so zeigt
alhier Paulus an / das er es seiner verhei-
schunge nach wol thun möge / vnnnd spricht /
nach der krafft / darmit er ihm alle ding kan
vnderthenig machen.

Vnd alhier gibt der Apostel zuuerstehen /
das der Herr Christus eine almechtige krafft /
macht vnd gewalt habe / vnd deshalben wird
auch Christus zum Tito cap. 2. ein grosser
Heyland genant.

Matth.

Matth. 28. spricht Christus / Mir ist
alle gewalt gegeben im Himmel vnd Erden.

Vnd also singet von ihm die Christliche
Kirche im Osterliede / Er kan erretten / alle die
zu ihm treten ꝛ.

Derhalben spricht der Hauptman zu
Christo / Sage nur ein wort / so wird mein
Knecht gefund.

Durch dieses almechtiges Wort / sind
Himmel vnd Erden erschaffen / vnd alle ding
im Himmel vnd Erden / vnd durch dasselbige
Wort werden sie auch noch erhalten / Durch
solch sein almechtiges Wort / hat der HERR
Christus vielen Francken / gebrechlichen / vnd
besessenen menschen geholffen / dardurch bekeret
er vns / vnd gebietet vns zu neuen menschen /
Darmit hat er der Hohenpriester diener zu
boden geschlagen / da er nur sagte / Ich bins /
Durch solch wort sind die Sacramenta kreff-
tig / vnd sie müssen sein vnd das wircken /
warzu er sie ordnet / Als in der Tauffe werden
wir abgewaschen von vnsern sünden / denn die
Tauffe ist nicht alleine schlecht wasser / sondern
ein wasser in Gottes wort gefasset / vnd mit
Gottes wort verbunden.

Im

Im Abendmal werden wir gespeiset /
vnd getrenckt mit dem Leibe vnd Blut Christi /
Denn der Herr Christus saget / Nemet hin vnd
Esset / das ist mein Leib / Trincket / das ist mein
Blut / Durch solch almechtiges Wort / wird
er vns am Jüngsten tage wider aufferwecken /
verklaren / vnd selig machen / Die Gottlosen
aber werden dadurch in die Helle / vnd ewiges
Verdammnis gestossen werden.

Wenn solche almacht vnd almechtiges
wort Christi / die ohmechtigen Sacramentirer /
vnd Calvinisten betrachteten vnd gleubten /
welche auch gerne aus Christo einen ohmech-
tigen menschen machen wolten / würden sie
von irer Gottlosen meinunge abstecken / vnd
gleuben / das vns der Herr Christus seiner ein-
setzung / verheischunge / vnd zusagunge nach /
wol seinen Leib vnd Blut / im Abendmal zu
essen vnd zu trincken geben künfte.

Vnd solcher almechtigen krafft Gottes /
vnd vnsers Herrn Christi / sollen wir vns
trösten in allen vnsern grossen gefehrlichkeiten /
Kranckheiten / vnd nöten / vnd sollen gedenccken /
gleuben / vnd sagen / Psal. 68. Wir haben einen
Herrn der hilfft / vnd vom tode errettet.

F

Psal.

Psal. 77. Die rechte Hand des höchsten
kan alles endern.

Esa. 59. Des Herren hand ist nicht zu
kurz/das er nicht helffen könne/vnd seine ohren
sind nicht zu dicke/das sie nicht hören.

Luc. 1. Bey GOTT ist kein ding vn-
möglich.

Also singen wir aus dem 130. Psalm/
Seine hand zu helffen hat kein ziel/wie gros
auch sey der schaden.

Derwegen wenn wir gleich vns selbst
nicht helffen können / noch andere menschen
vns helffen können oder wollen / vnd des-
halb an aller menschen hülffe verzagen müs-
sen / so sollen wir doch an Gottes macht vnd
hülffe nicht verzagen.

Vom Siebenden.

Es meldet auch hie Paulus / welchen
menschen solche wolthaten Christi wider-
faren sollen / denn ob gleich der HERR
Christus / allen menschen zu gut ein Heyland
in die Welt geboren ist / so ist er doch nur wie
Paulus saget / seines leibes Heyland / Ephe. 5.

Also

Also saget er hie / das er ein solcher Hey-
land sein / vnd kommen werde / denen die an ihn
glauben / vnd auff seine zukunfft hoffen vnd
warten: Von solchen hoffen vnd warten redet
er auch 2. Tim. 4. Hinförder ist mir beyge-
leget die Krone der gerechtigkeit / welche mir
geben wird der rechte Richter an jenem Tage /
nicht alleine aber mir / sondern auch allen denen /
die seine erscheinunge lieb haben.

Tit. 2. Vnd warten auff die selige hoff-
nung / vnd erscheinunge des grossen Gottes /
vnd vnsers Heylandes Ihesu Christi.

Heb. 9. Den menschen ist gesetzt ein mal
zu sterben / darnach aber das Gerichte / Also
ist Christus ein mal geopffert / weg zu nemen
vieler sünde.

Zum andern mal wird ehr ohne sünde
erscheinen / denen die auff ihn warten zur
seligkeit.

Darumb vermanet vns auch der Herr
Christus Luc. 21. das wir vns seiner zukunfft
frewen sollen / vnd wenn wir sehen die zeichen
vorher gehen / das wir vnsere heupter empor
heben sollen.

Vnd dis ist der letzte Artickel vnsers
glaubens von Christo / darzu wir hie vermanet
werden /

werden / dadurch auch die andern vorgehende
Artickel begriffen werden / wie denn Lutherus
sagt / das die Artickel des Christlichen glaubens
an einander hengen / wie eine kete / denn
gleich wie eine kete nicht mehr eine kete ist /
so ein glied daran zerrissen wird / Also auch
welche in einem Artickel des glaubens irren /
oder denselbigen verneinen / die geraten ge-
meiniglich dahin / das sie die andere auch ver-
neinen / vnd das sie darnach gar nichts glauben /
wie wir ein augenscheinlich Exempel an den
Sacramentirer haben / welche die weil sie da-
hin geraten sein / das sie die gegenwertigkeit
des Leibs Christi im Abendmal verleugnen /
so sechten sie auch an die Person vnd Maiestet
Christi / seine auffart vnd sitzen zur Rechten
Gottes / vnd verfelschen deshalb viel deut-
licher Sprüche der heiligen Schrift.

Die vngleubigen aber vnd vnbusfer-
tige / seind nicht Bürger vnd Einwohner des
Reichs Gottes / sondern werden ausgestossen
werden in das eusserste finsternis / da wird sein
heulen / vnd zeen klappen.

Derwegen sollen wir zusehen / das wir recht
gleubig sein an den Herrn Christum / damit wir
durch ihn zu vnser Himlischen wonunge vnd
vnser

vnfers leibes verklerunge kommen / vnd die
weil der glaube nicht jedermans ding ist / ja in kei-
nes menschen fleisch vnd blut steckt Matth. 16.
So sollen wir vleissig bitten den heiligen Geist /
vmb den rechten Glauben allermeist / das er vns
behütte an vnserm ende / wenn wir heimfaren /
aus diesem elende / Sollen Gottes wort vleissig
hören / vñ die Sacrament gebrauchen / Vnd mit
demselbigen anhalten / damit wir dadurch einen
glauben bekommen / vnd darinnen gesterckt /
gemeret / vnd erhalten werden / vnd das ende
vnfers glaubens / des leibes vnd der seelen selig-
keit dauon bringen mögen / Amen.

Dad die weil wir einen solchen Heyland an
dem Herrn Christo haben / der vns zu sol-
cher Himlischen wonunge vnd verklerunge
helffen sol / so sollen wir auch nicht alleine also an
ihn gleuben / sondern auch dester getröster auff in
sterbē / wie Simeon Luc. 2. Herr nu lestu deinen
diener in friede faren / denn meine augen haben
deinen Heyland gesehen / welchen du bereitet
hast / für allen Völkern 12. Vnd so jemandes
von den vnsern in solchem glauben von hinnen
scheidet / sollen wir vns darüber zu frieden ge-
ben / vnd im solche Himlische wonunge / vnd bür-
gerschaft wol gönnen.

Zf 5360

AK

X220736

Vnd also / nachdem diese Edle vnd viel
Ehugentsame Fraw / welche wir jetzt zum Bes
grebnis geleitet / auch mit getrostem vnd freu
digem herzen auff Christum gestorben / nem
lich in rechtem erkentnis / glauben / bekentnis /
vnd anruffunge des Herren Christi / so ist sie
auch gewis selig / wie geschrieben stehet / Selig
sind die im Herren sterben / dessen sol sich ire
Freundschaft getrösten / vnd sie / vnd wir alle
samt sollen durch die gelegenheit vnd betrach
tunge / Gott von herzen bitten / das er vns
auch durch seinen heiligen Geist / seine gna
de verleihen wolle / Christlich zu leben /
vnd selig zu sterben / Vnd darzu helffe
vns allen / der barmherzige / vnd ge
trewe Gott / vmb seines lieben
Sons unsers Herren Jhesu
Christi willen /
A M E N.



Gedruckt zu Dresden durch
Matthes Stöckel.
1577.

M



B.I.G.

Farbkarte #13

Black
3/Color
White
Magenta
Red
Yellow
Green
Cyan
Blue

v. Carlowitz

Z f
5360

reichpredigt:

Das Begrebnis

viel Thugentsamen
Bilpurgin Witfrawen /
Marij des 1577. Jars /
Christo seliglich ents
aselbst den 7. Febru
tlich zur erden
iget wor
den.

Johann von
Carlowitz

ehen von

Glafer/ Pre
Dresden.

XXVII.

